

DOMENIE XXXIII «VIE PAL AN»

Antifone di jentrade Gjer 29.11.12.14

Al dîs il Signôr: Jo o cognòs progjets di pâs e no di disgraciis;
mi clamarêts e jo us scoltarai
e us tornarai a menâ dongje di ducj i lûcs
là che us ai dispierdûts.

Colete

Signôr, nestri Diu, danus la gracie
di cjatâ simpri la nestre contentece tal jessiti fedêi
parcè che dome servint chel ch'al à creadis dutis lis robis buinis
o podarìn vê gjonde complete e eterne.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Pr 31,10-13.19-20.30-31

Lis mans de brave femine a fasin simpri alc.

Dal libri dai Proverbis

Une brave femine cui le cjatial?

Il so valôr al è plui grant che no lis perlis.

Il cûr dal so om al sta fidât sun jê,

e al varà simpri ce vuadagnâ.

I da ce ch'al è ben, no il mât,
par ducj i dîs de sô vite.

Si interesse de lane e dal fil,

lis sôs mans a fasin simpri alc.

E cjape tes sôs mans la gurlete,

i siei dêts si messedin daprûf dal fûs.

E spalanche lis sôs mans al pùar

e i siei dêts ju slungje viers dal biât.

Cence tignince al è il biel fâ, un nuie la bielece,
la femine savie chê sì ch'e va laudade.

Daitji ce ch'a an fat lis sôs mans,
e lis sôs voris che le laudin a lis puartis de citât.

Peraule di Diu.

SALM RESPONSORIÂL dal Salm 127

R. Furtunât chel ch'al cjamine pai trois dal Signôr.

Furtunâts chei ch'a rispietin il Signôr

e pai siei trois a cjaminin!

De fadie des tôs mans tu mangjarâs;
tu varâs furtune e ben di ogni sorte. **R.**

La tô femine tant che une vît ch'e bute
te intimitat de ô cjase;
i tiei fis tant che menadis di ulif
torator de ô taule. **R.**

Ve cemût ch'al è benedît
l'om ch'al rispiete il Signôr.

Che il Signôr ti benedissi di Sion,
par che tu gjoldis de bondance di Gjerusalem
ducj i dîs de tô vite. **R.**

SECONDE LETURE 1 Ts 5,1-6

Come un lari di gnot, cussì e rive la zornade dal Signôr.

De prime letare di san Pauli apuestul ai Tessalonicêz

Fradis, par chel ch' al rivuarde il temp e l'ore, nol covente che us scrivìn. Di fat o savês benon dibessôi che la zornade dal Signôr e rive come un lari di gnot. Cuant che us disaran: «Pâs e sigurece», in chê volte a colp e plombarà sore di vualtris la ruvine, come lis dois dal part a une femine ch'e sta par parturí, e no 'nt scjamparà un.

Ma vualtris, fradis, no sêts intal scûr, di mût che chê zornade us capiti a tradiment come un lari; di fat vualtris o sêts ducj fîs de lûs e fîs dal dî; nô no sin ni de gnot ni dal scûr. Par chel no durmìn come chei altris, ma o veglin e o savìn misurâsi.

Peraule di Diu.

CJANT AL VANZELI Mt 24,42.44

R. Aleluia, aleluia.

Veglait e tignîtsi pronts,
parcè che no savês in ce dî ch' al ven il Signôr.

R. Aleluia.

VANZELI Mt 25,14-30

Tu sêts stât fedêl tal pôc: jentre te gjonde dal to paron.

Dal vanzeli seont Matieu

In chê volte, Gjesù al disè ai siei dissepui cheste parabule: «Un om, stant par partî, al clamà i siei servidôrs e ur consegnà la sô robe: a un i de cinc talents, a un altri doi e a un altri un; a ognidun seont la sô capacitât, po al partì. Cence pierdi temp, chel ch' al veve vûts cinc talents al le a traficâju e int vuadagnà altris cinc. Compagn chel ch' al veve vûts doi talents int vuadagnà ancje lui altris doi. Ma chel ch' al veve vût dome un talent al le a sgjavâ une buse te tiere e al platâ i bêçs dal so paron. Tant temp dopo, al rive il paron di chei servidôrs e ju clame a fâ i conts. Si presentà chel ch' al veve vûts cinc talents e int puartâ altris cinc disint: Paron, tu mi âs dâts cinc talents. Ve, ind ai vuadagnâts altris cinc. I disè il paron: Ben, servidôr bon e fedêl; za che tu sêts stât fedêl tal pôc, ti darai podê tal tant; jentre te gjonde dal to paron. Po si presentà chel dai doi talents e al disè: Paron, tu mi âs dâts doi talents. Ve, ind ai vuadagnâts altris doi. I disè il paron: Ben, servidôr bon e fedêl; za che tu sêts stât fedêl tal pôc, ti darai podê tal tant; jentre te gjonde dal to paron. Par ultin si presentà ancje chel ch' al veve vût dome un talent e al disè: Paron, o savevi che tu sêts un om dûr, che tu seselis là che no tu âs semenât e tu cjapis sù là che no tu âs butât; par chel o ai vude pôre e o soi lât a platâ il to talent sot tiere. Ve, cjape ce ch' al è to. Ma il paron i rispuindè: Servidôr trist e poltron, tu savevis che jo o seseli là che no ai semenât e o cjapi sù là che no ai butât; par chel tu varessis vût di dâur i miei bêçs ai bancjîrs, di mût che, tornant dongje, o varès podût ritirâ il gno cul interès. Poben, cjolêtji il talent e daitlu a di chel ch' ind à dîs. Di fat a di chel ch' al à i sarà dât e al varà bondance, ma a di chel che nol à i sarà cjolt ancje ce ch' al à. E il servidôr poltron butaitlu fûr tal scûr; li al sarà dut un vaï e un crustâ di dincj».

Peraule dal Signôr.

Su lis uifteris

Signôr, fâs che il regâl
presentât denant dai vòi de tô maiestât
nus otegni la gracie de religion
e nus siguri un'eternitât furtunade.

Par Crist nestri Signôr.

Antifone a la comunion Sal 72,28

Par me il gno ben al è dome stâ dongje di Diu,
tal Signôr Idu o ai metût il gno ripâr.

O ben: Mc 11,23.24

Us al dîs in veretât: dut ce ch'o domandais te preiere,
crodêt di vêlu za vût e us sarà dât, al dîs il Signôr.

Daspò de comunion

O vin ricevûts, Signôr, i regâi dal to sant misteri
e ti preìn cun dute umiltât
ch'al zovi a fâ cressi il nestri amôr
ce che to Fi nus à ordenât di fâ in sô memorie.
Par Crist nestri Signôr.